

beschriben. Ouch habe ich den obgnanten herren deme . . techande vnd deme capitele globt vnd globe in disem brife vor eyne gute rechte gewere der egnanten gutere vnd zcinse, di ich en ouch vorburget vnd vorwisset habe, daz yn genugit, alzo daz si der egnanten zcinse vnd gutere von mir vnd mynen erbin sullin gewert werdin mit allen rechtin vnd zcugehorungen, als ich di gehat habe, als des landis recht vnd gewonheit ist, ane allis arg vnd geuerde. Were abir ab ich di egnanten herren nicht geweren mochte alz vorgeschriben stet, so sal ich adir myne erbin den egnanten herren alle ir geld, daz ich dor vmbe vor enphangen habe widir gebin, so sullen si denne ouch mir adir mynen erbin di selbin czinse vnd gutere widir vflaßin vor mynem herren deme bischofe mit allen den rechten, als ich en di vorgetan vnd ufgelaßin habe. Daz daz allis alzo stete vnd gancz gehaldin werde, habe ich myn insigil an disen brif gehangen, der gegeben ist zcu deme Hayn noch Cristi geburte driczenhundirt iar in deme dry vnd achtzigistem iare an deme nehesten fritage vor sente Donati tage des heiligen bischofes.

Nach dem Orig. im Stiftsarchiv zu Meissen mit dem Siegel des Ausstellers an einem Pergamentstreifen.

No. 679. 1383. 31. Juli.

*Die Bürger Hencze Kelle und Fricze Dragosch zu Grossenhain verbürgen sich dem Capitel für Festhaltung des vorstehenden Verkaufs.*

Ich Hencze Kelle vnd Fricze Dragosch burgere zcum Hayne obir Elbin, wir bekennen in disem offin brife vor allin den, di en sehin horen adir lesin, daz wir mit dem erbern vnd wisin vnserm fründe, meistir Frideriche Dragosche, ouch burgere zcum Hayne vnd vor en yn guten truwen mit gesamtir hand vnd ane allis arg vnd geuerde den erbern herren deme techande vnd deme capitil der kirchin zcu Misne recht vnd redelich globit habin vnd globin in disem brife vor eyne gute vnd rechte gewere alle der zcinse vnd gütere gelegin in deme dorfe zcu den öbern Redirn in deme Heynischen gerichte, di des egnanten vnsers frundis gewest sin vnd di her den egnanten herren vorkouft hat, alzo daz wir der selbin zcinse vnd gütere in allir maße, alz sy der egnante vnser frund noch lute synes brifes verkouft hat, weren sullin vnd wollin di egnanten herren den . . techand vnd daz capitil zcu Misne, als des landis gewonheit vnd recht ist, ane alle widirrede. Dez zcu orkunde vnd offin bekentniße habin wir vnserere insigele mit gutem willin vnd wissin an disen brif laßin hengen, der gegeben ist zcum Hayn, noch Cristi geburte driczenhundirt iar, in deme dry vnd achtzigistem iare am nehestin fritage vor sente Donati tage dez heiligen bischofes.

Nach dem Orig. im Stiftsarchiv zu Meissen mit zwei Siegeln an Pergamentstreifen.